

儀
顧
堂
題
跋

儀顧堂題跋卷八

歸安陸心源剛甫著

元槩六經天文編跋

六經天文編二卷題曰浚儀王應麟伯厚甫元刻元
印本每頁二十行每行二十字版心有字數及刻工
姓名是書以易書詩周禮禮記左傳諸家註釋爲主
而參以史志史志之外兼及素問易通卦驗乾鑿度
春秋緯文耀鉤王氏運氣論參同契大衍歷議皇極
經世楚辭天問注解顧新語楊泉物理論裨雅洪興
祖楚辭注天文錄杜佑通典諸書所採經說漢唐惟

鄭司農鄭康成虞仲翔馬扶風何承天劉光伯祖沖之孔沖遠數家餘皆宋儒之說也有徐氏家藏白文方印張寬德守之朱文方印張任文房之印朱文方印子孫寶之朱文方印曾在汪闥原家朱文方印平湖錢夢廬所藏宋本却掃編亦有徐氏家藏子孫寶之二印黃薺圖定爲元人藏印惜無確證耳

原本數書九章跋

數書九章十八卷題曰魯郡秦九韶舊抄本宋史藝文志不列其名明文淵閣書目始著于錄以示樂大典本參校分卷不同編次亦異皆館臣所更定提要所謂疏者辨之誤者正之顛倒者次第之是也此則猶原本耳題曰魯郡著舊望也案韶字道古秦鳳閣人年十八爲義兵首後寓湖州累官知瓊州與吳履齋契合爲賈似道所陷謫梅州而卒周密癸辛雜識敘其事甚詳毀之者亦甚至焦里堂力辨其誣愚謂九韶旣爲履齋所重爲似道所惡必非無恥之徒能

于舉世不談算法之時講求絕學不可謂非豪傑之士父季樞寶慶中官潼川守九韶隨侍見四川石魚題字其人乃貴公子非土豪武夫其爲義兵首也當以故家世族爲衆所推自序所云際時狄患厯歲遙塞不自意全于矢石閒者當在紹興十二年蒙古破興元府時至淳祐七年却近十年故曰苒荏十稷也焦里堂謂爲義兵首不知何年殆未細考耳密以詞曲賞鑒遊賈似道之門乃姜特立廖瑩中史達祖一流人物其所著書謗正人而于侂冑似道多恕詞是非顛倒可知觀九韶所作十系洞達事機言之成理

其于經世之學實有所得惜宋季競尙空談不能用
其長耳大典本題作數學九章明文淵閣目同此本
作數書九章豈明以後人所改歟

弧矢算術跋

弧矢算術二卷明顧應祥撰嘉靖二十六年刊本以文淵閣傳抄本互校閣本圓徑圖後缺二葉計七百餘字假如周天徑一百二十一度七十五分二十五秒條七十三秒七五爲下法脫兩葉計八百餘字嘉靖距今三百餘年

所收已缺四葉註明原缺無从校補無怪宋以前人著述十不存五耳

毛抄楊輝算法跋

田畝比類乘除捷法二卷算法通變本末乘除通變
算寶算法取用本末合爲上中下三續古摘奇算法
一卷皆題錢唐楊輝編惟算法取用本末題錢唐楊
輝史向榮編前有德祐改元自序序後摹有謙光二
字白文方印晚山書院白文方印每葉三十二行行
二十五字汲古閣影寫宋刊本案輝仕履無攷僅據
題名知爲錢唐人據序後印記知爲字德輝而已以
郁氏新刊本參校凡校勘記所補正此本皆不缺不
誤其未補者田方二里條外圍下闕求積二字以八

除之下缺爲字圓田六法條固自乘十二而一圖殘
缺圓用周三徑一之法闕圖方圖缺大半今有環田
條外周之數上缺環田中周四字環田上缺九章帶
分子五字下缺誤刊二字乘除通變算寶卷中重加
術條重加定位並下缺依本法三字稅錢上缺官收
二字問下缺收字埕地條加上闕連身二字米九十
七石條繁矣上缺見字求一代乘除說莫不隨題下
缺用意二字其下缺可字題以下缺覺後知三字求
一除條遇四兩下缺折組倍三字折下缺本从法三
字九歸詳說自伸下缺引歸法取四字仍用商除下

缺是一題涉四字輝嘗原下缺作術本意四字混然
歸法下脫不字算無定數詳說二十三下脫十六
二字算法取用本末問題上缺遇字直田長九十步
條雖可下脫倍字而下脫因字毛本皆不缺乘除通
變卷中官收稅錢條此題若加二位必繁而用重加
郁本譌作法身下有二位必須而用重加此皆可正
郁本之譌而補其缺蓋郁氏刊是書時所見皆轉輾
傳抄之本觀跋語以不得見原本爲恨則此本之難
得可知矣卷中有毛晉私印朱文方印子晉朱文方
印汲古主人朱文方印毛扆之印斧季朱文二方印

儀顧堂題跋卷八

五

蓋毛抄之至精者當與宋刊同觀

學林跋

學林十卷宋王觀國撰提要觀國字至道長沙人其
事蹟不見于宋史湖廣通志亦未之載愚案觀國政
和九年進士簽書川陝節度判官以招諭逋逃勞轉
一官紹興初官左承務郎知汀州甯化縣主管內勸
農事兼兵馬監押累升祠部郎中十四年御史李文
會劾觀國與直學士院劉才邵皆万俟卨腹心出知
邵州見繫年要錄宰輔編年錄羣經音辨後跋劉才
邵榔溪居士集慕容彥逢摛文堂集

明抄緯畧跋

緯畧十卷題曰高似孫續古集明抄本每卷有目連屬篇目尚存宋本舊式有甯山記三字白文長印甯山翁書畫印朱文長印其人無考卷中有墨筆批校黃堯圃辨爲柳大中筆每卷之首板心硃筆題曰卷幾則何義門筆也校以守山閣刊本每卷之目全缺凡舛本雙行注此本單行低一格卷十漢甘露鼎調滋味下守山本脫七十六字筆彙条二百九十五字守山本全缺此本則完具也其他字句參差更不勝枚舉耳

雞肋編跋

雞肋編二冊不分卷計一百二十葉每頁二十二行
行二十一字舊抄本前有紹興三年清源莊季裕自
序吳尺鳧所手校也有敦夙好齋珍藏書畫印九字
朱文長印繡谷二字朱文長印案季裕名綽以字行
太原府清源縣人南渡後寓居江西之上饒博物洽
聞建炎中累官右朝請郎充江南西路安撫使參謀
官二年朝奉郎都總管同幹公事紹興元年通判建
昌軍奏言大觀以後避龍天萬載等字更易州縣名
不當詔復舊名十二年朝奉大夫知筠州慈祥清謹

緣飾儒術又守鄂州程俱北山集有詩送行著有杜
集援証筌法新儀及本草備要三卷明堂針灸經二
卷膏肓灸法二卷見天台續集別編三餘集高安郡
門記繫年要錄卷四十三西江志北山小集書錄解
題及陳孝先跋

坦齋通編跋

坦齋通編一卷宋邢凱撰案凱字廷舉江西武甯人
嘉定七年進士紹定二年召試館職除祕書省正字
八月通判吉州擢知江陰軍嘉熙二年除著作佐郎
兼權司封郎中官至吏部侍郎致仕歸築巖岡書院
儲書萬卷箸筆衡及此書見中興館閣錄南昌府志

鵝鳴館本西溪叢語跋

西溪叢語二卷題曰宋剡川姚寬撰板心有鵝鳴館刻四字前有嘉靖戊申俞憲序憲據西京馬西玄抄本刊于武昌者也鮑淥飲據淡生堂抄本補二条卷上海上人條後趙純師孟条前補凡木一歲生一節來歲後于節再長也十六字宣和貴人條後李商隱条前補樹萱錄引杜詩云虬鬚似太宗色映寒夜春又云子章髑髏血模糊懷中瀉出呈大夫三十三字汲古本卽從此本出而佚令威自序

春渚紀聞跋

春渚紀聞十卷題曰韓青老農何遠撰毛子晉校宋明抄本前有錢曾之印四字白文方印遡王二字朱文方印孫從沾印白文方印慶增氏朱文方印後有錢曾二字朱文腰圓印述古堂圖書記朱文長印孫慶增家藏朱文方印蓋汲古閣藏書後歸述古堂又歸孫慶增者也未有嘉靖丙戌菊月望日謄錄一行又有崇禎庚寅以宋本校一過潛在一行潛在者毛子晉之號也案遠字子遠浦城人父去非喜論兵著有備論二十八篇爲東坡所奏進遠博學多聞工詩

喜鼓琴見章惇蔡京相繼柄國時事日非遂不仕以
父爲軾所知凡軾遺文佚事小辨雜說無不收誦先
是去非葬于富陽之韓青谷遠卜築韓青以保先塋
自號韓青老農好爲青麻短製時曳曲竹簪欵林莽
中步登半峯以望江湖吳中人翕然好之比之和靖
處士林逋云見福建通志

影宋本避暑錄話跋

己卯避暑錄話二卷題曰宋葉夢得少藴箸每半葉
十行每行二十一字幘字註御名凡遇太宗眞宗仁
宗等字皆提行或空二格蓋從宋孝宗時刊本影寫
卽津逮祕書之祖本也敦字亦缺末筆刊板後所刻
改也

舊抄巖下放言跋

巖下放言三卷題曰石林翁舊抄本卷下凡人之生
條是謂能移此下脫與天爲一而非人也云云一百
七十五字孔子與子貢子夏言詩條不可及上脫一
百二十五字今據別本補錄別本亦多誤字獨此葉
不缺

蘆浦筆記跋

蘆浦筆記十卷宋劉昌詩撰舊抄本有馬寒中三字
朱文方印衍齋二字朱文葫蘆印華山馬氏白文方
印紅藥山房攷藏私印朱文長印蓋康熙初馬寒中
舊藏也以知不足齋刻本校之卷二趙清獻筆記二
日晴聖駕幸覆考所起居後鮑刻脫考到諸科卷子
三日晴上巳日聖駕幸覆考所起居四日微雨春寒
駕幸覆考所起居九行淥飲刻是書先借龔翔麟抄
本傳錄龔本傳自黃俞邵千頃堂黃本爲明萬厯間
謝兆申手抄後又得謝在杭小草齋抄本補脫文二

行更定三條可謂勤矣而不知清獻日記中尙缺三
行信乎傳刻古書之不易也

鶴林玉露跋

鶴林玉露十六卷明刊本題曰廬陵羅大經景綸愚案南宋時江西有兩羅大經其一吉水人嘉定十五年壬午解試寶慶二年進士其一咸淳九年解試廬陵人未嘗第進士以時代揆之當以寶慶進士爲近其人累官容州法曹掾攝校官立高登祠于學宮并祀吳元美見江西通志及本書其卷十六記竹谷老人畏說一條有同年歐陽景賢語景賢當卽歐陽瑋之字發解稱同年自宋已然矣

琴堂諭俗編跋

琴堂諭俗編二卷宋鄭至道撰彭仲剛續原本久佚
從永樂大典錄出案至道字保衡福建莆田縣人祖
伯玉箸有錦囊集父叔明箸有錦囊三集至道元豐
二年進士歷知台州之天台韶州之樂昌縣箸有劉
阮天台洞記錦囊四集及此書見閩書

五總志跋

五總志一卷宋吳垞撰案垞與國永興人祖中復官御史宋史有傳書中所稱大父事仁宗爲御史云云是也中復爲犍爲令土產紅桑紫竹荔枝三香爲民害作三戒詩勒諸石事見方輿勝覽與書中所云嘉州歲貢荔枝紅桑云云合父則禮累官直祕閣知虢州箸有北湖集崇甯二年編管荆南見長編紀事本末書中所稱崇甯乙酉謫居荆南與北湖集百憂集行疇昔罪臣投荆南之句合垞紹興十三年七月爲樞密院編修官八月提舉浙西茶鹽十四年十二月

改除兩浙運副十五年七月奏具便民事乞令常平
司支借錢穀勸民濬決華高等處沿海三十六浦以
泄水勢庶無滄損民田之患詔可累官直徽猷閣成
都府路轉運副使知荆南府二十四年五月請祠主
管台州崇道觀時鼎澧茶寇猖獗殺傷鼎澧巡檢焚
澈浦縣堦未受命以憂死嘗編其父則禮所著詩文
爲北湖居士集十卷見繫年要錄方輿勝覽咸淳臨
安志北湖集韓駒序


鼠璞跋

鼠璞一卷題曰桃源戴埴仲培父宋刻小字本愚案
植鄞縣人祖機字伯度紹熙初以特恩補官爲金華
主簿父燧亦進士見攻媿集戴機墓志兄埴紹定五
年進士官大府卿埴嘉熙二年進士持節將漕見寶
慶四明志王伯厚戴氏桃源世譜引余初疑桃源爲
埴之原貫但世譜引謂爲晉戴逵之後逵望譙國後
居剡川與桃源無涉蓋鄞有桃源鄉宋張卽之居之
箸有桃源志戴氏亦世居鄞之桃源鄉故譜稱桃源
戴氏然則桃源乃鄉名非縣名也埴爲四明人故書

中多辨正四明事新修鄞縣志采摭甚備埴附機傳
而不知卽箸鼠璞之戴埴進士表旣無其名藝文志
亦無此書亦缺典也

澗泉日記跋

澗泉日記三卷永樂大典本案澆以父蔭補京官清苦自持史彌遠當國羅致之不少屈一爲京局終身不出人但以韓判院稱南澗晚年有宅一區伏臘粗給仲止貧益甚客至不能具胡牀只木杌子而已長沙吳某得廣東憲專狀遣吏送酒錢仲止出問曰你官人交割了也吏曰方去上任仲止作色云近來官員不到任先動公使庫物韓某一生不曾受此其清節如此見東南紀聞



宋槧白氏六帖類聚跋

白氏六帖事類聚三十卷宋仁宗時刊本每葉二十
六行每行二十六七字不等小字雙行每卷有目連
屬篇目匡敬恒皆缺筆貞字不缺蓋仁宗時刊本也
分十二冊卷一二爲第一冊卷三四爲第二冊卷五
六爲第三冊卷七八爲第四冊卷九十爲第五冊十一
十二爲第六冊十三至十五爲第七冊十六至十八
爲第八冊十九至廿一爲第九冊卷廿二廿三爲第
十冊廿四至廿七第十一冊廿八至三十爲第十二
冊版心有帖一至帖十二等字余見常熟瞿氏北宋

本史記分三十冊版心亦如此蓋北宋時舊式至南宋而無此式矣案是書原名白氏經史事類見新唐書藝文志六帖者時人以爲括帖之用而名之見書錄解題引醉吟先生墓志衢本郡齋讀書志六帖白居易撰凡天地事物分門類爲對偶而不載所出書曾祖父祕閣公爲之注是唐本無注而注乃公武曾祖祕閣所爲矣案王珪華陽集提點京東諸路刑獄公事兼諸路勸農事朝散大夫行尚書祠部員外郎充祕閣校理上輕車都尉借紫晁君仲衍墓誌銘稱仲衍以唐白傅所撰事類集傳者寢舛乃參攷經史

一以刊是之仍據舊目補攷摭新別爲後集三十卷
曰類事後集卽此書也宋經注皆別行故北宋本經
傳有單注單疏本仲衍注六帖時本與原書別行故
曰後集至刊板時乃合爲一然自宋至今無人知爲
仲衍注者可慨也案仲衍字子長家開封之昭德坊
祖迴父宗慤宋史皆有傳初以祖任將作監主簿召
試西掖賜進士第七遷至祠部員外郎召試禁林充
祕閣校理乞補外知懷州專厲風節誅鋤豪強衆不
敢犯法就除京東提點刑獄皇祐五年卒爲人端粹
嗜學未嘗一日去書工文章丞相章得象晏殊箋記

皆出其手爲汴陽雜說一卷其言切于規諭兩晉文
類五十卷史論三卷文集二十卷端方端稟端彥其
子也見墓誌悅之詠之微之載之沖之覺之貫之其
孫也公壽公耄公逸公留公鄧公休公武公邈其曾
孫也第一冊第六冊第八冊第十冊有文淵閣印四
字方印每冊有臣筠二字朱文方印三晉提刑朱文
方印明永樂十九年取南京書儲左順門北廊正統
十八年移于文淵閣楊士奇等編爲文淵閣書目盈
字號第二廚有白字六帖四部內一部注云四十冊
此本四冊有印明初必訂四冊所云四十冊疑卽此

本十字乃衍文耳不然此書通計不過五百餘葉安得有四十冊之多耶其流入民間也或爲分宜所竊或由甲申之變則不可考矣宋筠商邱人榮之子也官山西按察使所藏尙有孔帖三十卷今歸

內

府見 天祿琳琅書目汪氏藝芸書舍宋刊書目有南宋麻沙本白氏六帖題曰新雕添註白氏事類出經六帖當是宋季麻沙坊刻後歸烏程蔣氏余曾借校一過妄刪妄增譌謬奪落指不勝屈以視此本蓋有霄壤之別矣

古今姓氏書辨證跋

鄧名世古今姓氏書辨證失傳已久乾隆中館臣從永樂大典錄出名世舉主官階繫年要錄謂劉大中薦以進士召對玉海則謂以布衣召對朱子語類又謂由趙汝愚薦授著作郎提要以三說不同未詳孰是愚案名世字元亞江西臨川人文昌先生考甫之孫也于書無所不觀于事無所不學自幼挾策一覽無遺先是議臣禁春秋學名世獨嗜之試有司屢以援春秋黜同舍又告以毋藏元祐黨人文集笑曰是足以廢吾身乎遂杜門養母不求仕進研究經史尤

長春秋嘗以經傳國語參合援據爲春秋國譜年譜地譜人譜凡六卷辨先儒言春秋之失爲辨論譜說十篇並行御史劉大中宣諭江南見之薦于朝紹興三年十月丁亥召赴行在四年三月乙亥進春秋四譜及此書吏部尙書胡松年看詳以爲簡古明切多所證據三月以布衣召對賜同進士出身授右迪功郎後進治人務實二策高宗嘉納九月除史館校勘五年二月除祕書正字七月丁憂七年十一月除校書郎十年五月除著作佐郎先是修哲宗實錄亡元祐八年若干卷名世參攷御人及日厯時政記玉牒

等書補成之又編建炎以來日厯至紹興九年止爲書三百七十卷十一年九月以議切時政忤秦檜爲言者論罷十一月以擅寫日厯勒停久之終于家二十六年五月進士鄧椿年言故父左奉議郎以忤時相廢弛不該日厯賞典乞褒賞乃特贈左承議郎其所著書尙有春秋類史春秋公子譜列國諸臣圖宋朝宰相年表皇極大衍數大晟樂書文集合三百卷見高棅姓氏書辨証序李心傳繫年要錄陳騭中興館閣錄朱子語類西江人物志淩稚隆萬姓統譜名世事迹略具于斯其人其書皆卓然可傳宋史文苑

不爲立傳可以見歐陽元等之疏矣繫年要錄六十
九稱撫州進士鄧名世卷七十四又稱草澤鄧名世
中興館閣錄亦稱以草澤上殿則前之稱進士衍文
也非不同也其由草澤名對出于劉大中之薦要錄
玉海皆同其遷著作佐郎或出于趙汝愚之推轂其
歷官初授右迪功郎終于著作佐郎要錄玉海與朱
子語類似異而實同也至畫繼乃雙流人鄧椿字公
壽所纂名世之子名椿年非名椿不但里貫如風馬
牛卽名亦不同也畫繼提要與姓氏書辨証提要兩
岐當從畫繼提要爲是

源流至論別集跋

元刻源流至論別集宋黃履翁撰提要履翁字吉父不知其里貫疑亦閩人也愚案履翁福建甯德縣人紹定五年進士以林垗所輯源流至論未備復爲彙輯別集十卷見閩書

詩學大成跋

詩學大成三十卷元刊本宋毛直方撰

四庫所未收也愚案直方字靜可福建建安縣人咸
淳中鄉薦入元不仕授徒講學士爭趨之著有詩宗
羣玉府三十卷聊復齋稿二十卷治靈稿四卷見八
閩通志

羣書編類故事跋

羣書編類故事二十四卷題曰四明王縈集泰和梁
輅校正明宣德刊本半葉十二行行廿四字研經室
外集云縈姓名見寧波府志明初曾任廣東肇慶太
守事跡無攷其明史藝文志及藏書家均未箸錄此
本從明莫雲卿家藏元刊影寫愚案縈字宗器號樂
淡家貧積學自立中永樂六年鄉試明年授睢寧教
諭擢禮科給事中改刑科宣德五年十一月擇廷臣
二十五人爲郡守以縈守肇慶奉勅行增修水利作
興學校令行政舉境內帖然居九年進秩二等徒治

有廬先生集卷之五
西安如治肇慶越三年致仕卒年七十見明史李驥
傳寧波府成化志肇慶府志以宣德五年守肇慶居
九年調西安又三年卒年七十推之當終于正統六
年辛酉生于洪武五年壬子其非元人明矣研經題
爲元人不免爲門客所欺耳卷首有宣德時序書賈
抽去末頁以充元刊以序中肇慶守四明王公一語
証之則必宣德中刊也卷中有莫雲卿印四字白文
印前明曾爲莫是龍藏知阮文達所進呈卽從此本
出矣

書勞氏雜識後

右勞氏雜識十二卷仁和勞格季言纂歸安丁兆慶
葆書所編也季言熟於唐宋典故考訂詳細可取者
多惟卷十一孫奕一条頗爲全書之累蓋宋有兩孫
奕一爲北宋人以氣節箸一爲南宋人以箸述傳北
宋之孫奕字景山福建閩縣人皇祐元年進士歷知
南陵海陵吳縣呂誨知開封薦知封丘縣誨拜御史
中丞薦爲臺推遷監察御史論新法爲鄧綰劾奏出
監陳州酒稅陳襄知杭州辟爲僉判移監四州轉般
倉元祐初除本路轉運使卒見梁克家淳熙三山志

卷二十六南宋之孫奕字季昭江西廬陵人號履齋
箸有示兒篇二十三卷成於開禧元年而自爲之序
雖無他書可証而書中數與謝良齋周益公評論詩
文周旋往復屢引張子韶書解林少穎羣經辨惑史
炤通鑑釋文呂東萊宋朝文鑑胡仔漁隱叢話洪景
盧容齋隨筆欸乃齋記蠙州記胡忠簡保靜菴記跋
及朱晦菴楊誠齋言論其爲南宋開禧間人無可疑
者開禧元年距景山登第之歲百五十七年距景山
權御史之歲百三十六年登第之歲未見三山志猶
可諉爲不知權御史之歲續通鑑長編載之雜識引

之豈有百三十年前舊御史而猶安然無恙箸書林
下者乎固不待詳其里貫而後明其非一人矣季言
漫不加考屢引長編忠惠亾古靈集爲佐証以補示
兒編提要之缺不知其爲景山非季昭也夫古來同
名同姓史不絕書生不同時居不同方者固多同時
同里亦多有之而遽可移甲就乙乎季言讀書精審
猶有此失况粗莽滅裂者乎於以歎箸書之難也

儀顧堂題跋卷九

歸安陸心源剛甫輯

宣和書譜跋

宣和書譜二十卷不著撰人名氏相傳以爲卽蔡京
蔡卞米芾所定案衍極卷三云大德壬寅延陵吳文
貴和之哀集米宣和間書法文字始晉終宋名曰宣
和書譜二十卷據此則書譜爲吳文貴所撰集非蔡
米所定矣竊謂書譜畫譜皆非宣和所集故陳直齋
書錄解題不著于錄畫譜或出宋人之手故僞作徽
宗序文書譜出于文貴則鄭杓所目擊也蓋汴梁之

變宣和所藏盡輦而北金亡復入于元文貴當據元
時內府所藏及勢家所得成之故二王墨迹較之鐵
圍山叢談所見僅存十之一二耳余嘗見宋以前書
畫真迹有經宣和收藏而不入書畫兩譜者初頗以
爲疑今知兩譜非宣和所定則凡徽宗御題御印之
妙迹流落民間而非吳文貴輩所得見者正多又何
疑乎

圖畫見聞志跋

書錄解題圖畫見聞志六卷太原郭若虛撰元豐中自序稱大父司徒公未知何人郭氏在國初無顯人但有郭承祐今考史傳并承祐亦不載莫之詳也

四庫提要云若虛不知何許人書中有熙寧辛亥冬被命接勞北使爲輔行語則嘗爲朝官故得預接伴源案若虛太原人見直齋書錄解題熙寧三年官供

備庫使尙永安縣主見王珪華陽集東安郡王墓誌七年八月丁丑以西京左藏庫副使副宋昌言爲遼國賀正旦使八年爲文思副使坐使遼不覺翰林司

卒逃遼地降一官兄續通鑑長編郭氏顯人宋初有
郭守文郭進郭從義及其子承祐進深州博野人從
義沙陀人惟守文太原并州人守文贈侍中封譙王
女爲眞宗章穆皇后子崇德崇信崇儼崇仁崇德子
承壽承壽子若水若虛與若水同以若字命名同貫
太原家世顯官又同其爲兄弟可知陳氏直齋謂宋
初無顯人而獨舉承祐竟忘外戚之有譙王乎亦百
密之一疏矣崇德官至太子中舍崇信官至西京左
藏庫使崇儼官至崇儀使崇仁官至四廂都指揮使
史稱崇仁性愼靜不樂外官與序所謂雖貴仕而喜

廉退合司徒蓋所贈之官吏不書者略之也所稱大
父司徒公於崇仁爲近然不可考矣惟若虛里貫并
州爲守文之後則可無疑耳

畫繼跋

今人謂唐宋畫多不署名亦無印記或于樹石縫中細書名姓雙款始于元宋以前無此作愚按畫繼卷四云王冲隱名持字正叔長于翎毛學崔白嘗于邵氏兄竹棘雪禽二軸極清雅上題云正叔爲伯起作崇寧甲申則雙款不始于元北宋已有行之者又云劉松老字榮祖書學元章畫師東坡成都李才元家有四軸山水有印文云巨濟震子名松老者八字則宋人亦非必無印也

畫鑒跋

畫鑒一卷元湯屋撰前有屋自序其言米友智友仁弟亦善畫又善書元章云幼兒友智代吾書碑及大字更無辨門下許侍郎尤愛其小楷云每示簡可使令嗣書云云余案南宮善偽古人墨迹世所習聞友智能偽南宮書則人所不知也嘗觀紹興米帖所刻書札有稍弱者豈友智代書耶黃長睿法帖刊誤網米老之失最爲精確屋自言曾簪法帖正誤專指長睿之過愚謂長睿記問之博考訂之精宋人罕有其匹非屋所能望其項背法帖正誤雖不傳其書必無

可觀殆所謂蚍蜉撼樹者耶

書畫彙攷跋

書畫彙攷卷二十八載文衡山積雪卷衡山自題百
數十字後有都南濠二印有唐六如吳匏菴二跋衡
山題云余在京師友人持河陽關山積雪卷出示距
今思之已二十餘年矣輒洗筆摹一過案衡山行狀
以嘉靖癸未貢成均始入都實嘉靖三年時年五十
三後二十餘年當爲嘉靖二十五六年六如卒于嘉
靖二年距作圖已二十餘年匏菴卒于宏治甲子距
作圖幾四十年不得見此圖而作跋南濠卒于嘉靖
四年距作圖亦二十餘年不得見此圖而加印記况

衡山七十以後作無不題年歲而此圖無之其爲僞作無疑令之以鑒別名其書畫彙攷頗爲收藏家所重余恐其貽誤後人故爲攷証如右

書畫彙攷跋二

書畫彙攷立歷代鑒藏一門自六朝唐宋公私所藏

迄于明季各家備載其目可謂備矣然鄧椿畫繼所

載趙中大保之

士俾

趙伯兼節推王朝議國寶

良器

賈通判

公傑

程純老

唐

令狐陳古

諷

邵澤民侍郎

溥

邵太史公濟

博

張庭珪

璿

王朝議樂道

沂

劉寶賢提

刑璜

李大觀鄧符寶

叔誼

李敷文士舉

邦獻

王制幹

元朝

王晦叔撫幹

灼

張知縣

珩

陳與權安撫

古

李德

隅知郡

廉夫

盛季文章

章

宋去病

艾

太常少卿何子應

學衛知縣師房

昂

王茂先

桂

宇文季蒙龍圖

時中

郭

承臧效一

勉中

何道夫

耕

范忠甫

倅

趙修仲知縣

延

王子忠縣尉

焯

宇文子友主簿

子震

時廣叔

宏

呂

元鈞

陶

燕知縣

興祖

僧智永房黎邦基姚觀國通判

賓各家收藏數百種漏未登載又如徽宗御畫最著

者有筠莊縱鶴圖奇峰散綺圖龍翔池鵲瀾圖宣和

睿覽一千冊彙攷亦未收豈當時未見畫繼耶

畫史彙傳跋

畫史彙傳六十五卷道光中長洲彭蘊璣明峯輯纂錄至七千餘人可謂富矣然挂漏亦復不少如漢武梁祠堂畫像爲衛改所畫武梁碑云良匠衛改雕文刻畫羅列成行是其証也宋李誠字明仲鄭州管城人大觀初知號州博學多藝能工篆籀草隸又工畫嘗畫五馬圖以進爲徽宗所賞見程俱北山小集李公墓誌元郭文通江南人宣德間充內庭供奉工畫見張東海集卷四唐文質官平灤路鹽運副使大德四年奉詔繪遠方職貢圖名臣畫像方平官鄂州路

備學教授大德七年奉詔作彩畫地圖見元秘書志
徐雪舟元末上清道士嘗爲藍智畫藍澗草堂圖武
季遠元季人善畫竹木藍澗集皆有詩王芝字子慶
嘗爲藍仁之子仲穆畫藍原野牧圖張兼善元季人
工畫嘗畫雲樹圖松下看雲圖藍山集皆有詩彙傳
皆失收此外見于宋元集部說部可以補彭氏之缺
者尙不少也

校宋本琴史跋

琴史六卷宋朱文長撰黃蕘圃校宋本宋本每葉十二行每行十八字曹棟亭刊本房琯傳陸渾山下空四字誤以李勉傳佐勉有功以下相接房傳缺後半篇李傳缺上半篇宋本房琯傳後尚有張鎬傳一篇曹刊全缺趙元傳爲幽州下曹本缺宜錄二字盧藏用傳斥之也下宋本有以黔州長史五字

宋刻書小史跋

書小史十卷題曰錢唐陳思纂次宋槧本前有謝奕修手書序每半頁十一行行二十字朗匡亂最徵恆殷慎貞徵購皆缺避卷六至十宋刻卷一至卷五汲古閣所影寫也卽汲古閣秘本書目所著錄者有鼎元二字連珠印仲雅二字長印宋本二字橢圓印甲字方印子晉二字連珠印子晉之印朱文方印子晉書印朱文方印汲古得修綆長印蓋先爲王弇州所藏故有鼎元仲雅二印至明季而爲毛子晉所得宋以後無刊本近時藏書家罕箸錄亦希有秘笈也

劉蒙菊譜跋

菊譜一卷題曰彭城劉蒙宋刊小字本案蒙山東濱

州人

繫年要錄

政和六年通判揚州時江淮諸郡民苦水

患流移四出泰州高郵至三千人轉徙于楊蒙曲加

周卹咸得不死事聞特遷一官

嘉靖維揚志

尋以朝奉郎

爲江東轉運副使建炎元年九月奏請優恤翁彥國

上以其觀望李綱削一官蒙以曾奏彥國不法訴于

朝復其官移兩浙轉運副使三年加直祕閣四年爲

兩浙隨軍轉運使建議于浙西民間預借秋料苗米

從之

繫年要錄

當卽其人彭城者箸郡望也濱州有兩劉

蒙一字子明元豐中卒私諡正思先生宋史有傳又
宜黃人劉蒙字資深治平進士至朝請大夫見江西
通志清波別志云劉蒙賢良書干司馬溫公乞以鬻
下一婢之資五十萬以濟其貧又責公不效韓退之
所爲此又一劉蒙也

皇極經世觀物篇解跋

皇極經世觀物篇解五卷皇極經世鈐一卷指掌圖一卷聲音韻譜一卷起例一卷附錄二卷宋祝祕撰案祝祕字子涇江西德興人第進士歷官承直郎充江淮荆浙福建廣南路都大提點坑冶鑄錢司幹辦公事饒州路三司提領所幹辦公事傳邵氏皇極之學於廖應淮年老乞休御書觀物樓扁額賜之白號觀物老人元世祖詔徵不赴見饒州府志聲音韻譜者以皇極起數皆祖于聲音二百六十四字之姥取德清縣丞方淑韵心當塗刺史楊俊韵譜金人聰明

律呂篇是也
韻參合較定四十八韻冠以三百六十四姥以定康
節音韻之學經世鈐者爲圖九有圖無文指掌圖者
自夏禹八年爲七會之始三千六百年爲十二月圓
起例爲目七曰先天圓圖算歷代數先天方圖算人
物數起掛一卦曰四象斷法曰變卦爻法曰引用斷
卦附錄二卷前爲諸家論說後爲數學流傳諸人傳
也

稽神錄秦西岩抄本跋

稽神錄本十卷此本六卷乃從太平廣記輯出長夏無事與清齋四弟用廣記逐一校過改正不下千餘字廣記有而爲此本所遺者計三十條刻本又較此本少四條其郭厚張易廣陵木工三條皆見廣記林觀一條其前半乃集異記朱觀條之前半後半則稽神錄張謹之後半也今一一改正周延翰一條廣記二百七十九引作廣異記建業婦人一條廣記三百八十六引作搜神記洪州樵人一條廣記三百七十四引不註出處董昌一條廣記二百九十引作會稽

錄熊迺一條廣記四百十七引無貯在庭中以下三
十四字當是輯書者竄入耳郡齋讀書志作六卷一
百五十條恐亦非全本也

過庭錄跋

過庭錄一卷宋范公偁撰明刻本公偁自言爲文正公仲淹之元孫光祿之孫提要推爲純仁之曾孫光祿爲純仁幼子愚案忠宣五子長正明次正平次正思次正路次正國正明官單州團練推官與正路皆前卒忠宣薨時正平官忠武軍節度推官正思官宣德郎正國未官見曾肇范忠宣公世濟忠直之碑宋史正平傳中有以遺澤推與幼弟語蓋以正國未官故以遺澤與之是正國爲忠宣幼子確有可徵矣錄稱忠宣捐館許下服中先光祿卒其人當卒于建中

崇寧之間不得至南宋尙存而正國于紹興五年賜
三品服爲江東轉運判官八年知臨江軍九年爲廣
西轉運判官見繫年要錄則所稱先光祿決非正國
可知矣錄稱子正爲六伯祖子夷爲七伯祖而于其
祖則述忠宣語稱爲八郎子正正明字也子夷正平
字也正明行六正平行七則八郎爲正思可知史不
言正思官位略也碑稱宣德郎夫宣德郎乃階也非
官也碑言階而不言官略也其官當爲光祿之屬故
公僂稱爲先光祿也由是推之公僂之祖乃正思也
非正國亦非正路也忠宣孫七人直彥直方直雍直

英直清直舉直儒亦見忠宣墓碑錄中稱先子者十而不筭其字查直方于紹興元年以直秘閣爲荊湖宣撫使吳敏參謀官五年以刑部員外提刑福建六年爲左司員外郎都督府推行功賞文字改右司員外郎十年試司農卿爲淮北宣撫楊沂中謀議軍事爲萬俟卨論罷見繫年要錄與公偁所稱先子有御營參謀之除先子四十一歲已爲員外郎張德遠督兵淮上先子咨議幕中等語合則公偁當爲忠宣第三子正思之孫直方之子非幼子正國之孫也

南窗紀談跋

南窗紀談一卷不著撰人名氏明抄本書中有石林
與徐敦濟問答語疑卽敦濟所著攷徐度字敦立徽
宗時大宰處仁子南渡後寓居湖州著有卻掃編敦
濟疑卽敦立弟兄也因學紀聞云或云漢書內長文
所以見愛也古寫無註本內長文作而肆赦王念孫
讀書雜誌從之不知紀談先有此說矣葉景修名森
錢唐人趙松雪門人與王眉叟張伯雨相唱和見元
詩選小傳提要所據程晉芳藏本此條屬入正文此
本低二格寫尙不彛亂蓋善本也

宋朝事實類苑跋

影宋抄本皇宋事實類苑六十三卷前有紹興十五年月序後有紹興戊寅自志題曰左朝請大夫權發遣吉州軍州事江少虞撰少虞里貫仕履諸書皆未詳愚案江少虞字虞仲常山人政和八年進士調天台學官寇至守倅皆遁去少虞獨率弱卒堅守兩旬慷慨感激人有死志首射殺渠魁賊遂潰見宏治衢州府志宣和五年調四明教授七年改耀州教授見寶慶四明志紹興初知饒州四年知建州禁卒江勝與其徒謀叛少虞捕斬之十四年以朝請大夫權發

自唐書卷一百一十五
遺吉州軍州事見繫年要錄江西通志攻赤城新志
載宣和中滕膺爲台州參軍睦寇方臘聲震東南守
丞以下皆遁膺獨慨然自任召州人爲死守計旣而
呂師孟亦起仙居先後攻城膺手弓臨城殪厥渠魁
賊遂退走云云不言有少虞惟赤城志秩官門教授
表宣和元年江少虞名下註云見守台錄壁記不載
則守城時膺爲政而少虞助之耳

江鄰幾雜志跋

嘉祐雜志不分卷宋江休復撰明商濬刻本郡齋讀書志直齋書錄解題宋史藝文志文獻通攷皆作三卷此本不分卷不知所據何本曾慥類說第二十二卷採此書甚多有海市圖撲燈蛾屬國候解子猷急流中勇退渡金夫人唐詰初用紙鹽角兒令宰臣賜坐入閤幡然一翁服中作詩歷日謎文章造語難學士院使虜詩縉紳貸錢堯舜是一事試卷號女子目重瞳黑衣道士斜排雁翅謝卷啟是非波白字本草亭名內法酒省中會飲刀精雄黃元載蔽賢香孩兒

營啄木鳥夏英公墳夢爲鸛鶴有甚憑據水鶴試知
制誥班行取奉上司赤小豆傳腫風暖鶯嬌蔡君謨
外制紗公服原甫草表魑舞犬噬喉五通六粗中使
責知委狀覓藥回命痰嗽嗜蟹五十一條皆此本所
無侯鯖錄引南郊賞給景德寺佛兩條通鑑長編卷
九十八馬季良家本茶商卷一百八十四富范議建
儲又許州賈侍中坐又張安道云卷一百八十六陳
昭素卷一百八十七御廚日宰四十羊又雷簡夫判
設案日卷二十太宗自并幸幽卷一百八十七林洙
知壽州卷一百八十九公主誕慶又陳執中嬖妾張

氏又陳祖相就史館卷一百九十四韓維問李淑計
十三條愛日齋叢抄祕書丞宋飛卿一條皆此本所
無也

明抄江鄰幾雜誌跋

江隣幾雜志二卷補遺一卷次行有玉峯萊竹堂珍藏七字卷首葉有趙輯熙印四字白文方印素門二字朱文方印陸魚珍藏閱書六字朱文方印前後有孫慶增題語後有羅正季素門跋書中朱筆校補二十條據慶增跋則慶增據宋本所補也後有朱筆補錄七條則素門借天一閣本所校補也愚案所補二十條皆見侯鯖錄不云盡出隣幾核以世所傳醴泉筆錄無一不合則孫氏所云宋本或醴泉筆錄之宋本非真雜志宋本也惟休復卒于嘉祐五年見歐陽

文忠集不應述崇寧大觀時事王介甫生于天禧辛酉嘉祐初年甫三十官亦未顯不得稱老蘇東坡生于景祐三年嘉祐五年年二十五蘇邁生卒雖無攷既爲坡長子其時年不過十歲非鄰幾所得見山谷生于慶厯五年嘉祐初纔十餘歲張文潛生皇祐五年尙未及十歲休復安得引其詩文此本據醴泉筆錄所補前世錢未有草書者一條內有崇寧大觀間云云王介甫條稱此老又引山谷茶磨銘及稱高力士薺菜詩張宛邱夜直館中詩蘇邁伯達詩皆與時代不合恐醴泉筆錄之名是南宋時人僞造且有所

驛入轉不如稗海本未失真也

唐語林跋

唐語林八卷宋王讜撰原本久佚此則乾隆中館臣從永樂大典錄出以聚珍板印行者也直齋書錄解題云長安王讜正甫以唐小說五十家仿世說分三十五門又益十七門爲五十二門提要云讜之名不見于史傳考書中裴佖一條佖字空格註云御名宋惟徽宗諱佖則讜爲崇寧大觀間人矣案讜呂大防子壻也元祐四年七月除國子監丞右司諫吳安詩言其不協公論大防亦自請改除改少府監丞見李燾通鑑四百三十卷

分類夷堅志跋

新編分類夷堅志甲集五卷乙集五卷丙集五卷丁
集五卷戊集五卷己集五卷庚集五卷辛集五卷壬
集五卷癸集五卷題曰鄱陽洪邁景廬紀述建安葉
氏祖榮類編明刊板心有清平山堂四字葉祖榮仕
履無攷當是南宋末人各家書錄皆未箸錄甲集分
忠臣孝子節義三門乙集分陰德陰譴禽獸三門丙
集分冤對報應幽明二獄欠債妬忌四門丁集分貪
謀詐謀騙局姦淫雜附妖怪五門戊集分前定宴婚
嗣息夫妻三門己集分神仙釋教淫祀三門庚集分

神道鬼怪二門辛集分醫術雜藝妖巫卜相夢幻五
門壬集分奇異精怖墳墓三門癸集分設醮冥官善
惡僧道惡報入冥五門每門又各爲子目朱國禎湧
幢小品云夷堅志本四百二十卷今行者五十一卷
蓋病其煩蕪刪之當卽指此本也原書肆百二十卷
今惟存甲至丁八十卷宋刊爲愚所得已經刊入十
萬卷樓叢書支甲至支戊五十卷爲四庫所收

民間絕少傳本坊刊巾箱本綴拾叢殘爲之缺略尤
甚此本猶宋人所輯當見四百二十卷全書其所甄
錄出于今存八十卷及支志巾箱本之外者甚多不

但全書崖略可以考見卽宋人遺聞佚事亦往往賴此以存未可以刪削薄之也

宏明集跋

宏明集十五卷梁釋僧祐述明萬歷支那本顧千里以釋藏本校過藏本每卷有目連屬篇目支那本皆削之又改每篇標目上目下名如時文之式顧氏詆之當矣惟劉君白當爲劉善明之字故藏本一則曰劉君白答再則曰劉君白重答與全書一律顧氏謂君白非字以君代名則白字又作何解名善明而字君白其義相通史善明傳不著其字缺也藏本標曰皆著作之字支那本改書名不悟君白之卽善明而獨書其字未免自亂其例耳

廣宏明集跋

廣宏明集二十卷唐釋道宣述明萬歷支那本顧千里以釋藏本校過其刪去每卷之目改易篇目與宏明集同藏本卷二十七分上中下三卷此本合爲上下二卷荀濟仕梁力攻佛氏在當時可稱特立之士其奔魏也爲高澄所殺氣節亦有足稱者梁書不爲立傳北史雖有傳而不載闕佛之表均爲缺陷道宣採之以爲濟罪愚謂正可藉此以補史缺耳

雲笈七籤跋

雲笈七籤百二十卷宋張君房撰明張萱刊本案君房字尹才方壯始從學逮遊場屋甚有時名登第時年已四十餘以校道書得館職後知隨郢信陽三郡年六十三分司歸安陸年六十九致仕嘗撰乘異記三編科名定分錄七卷儆戒會叢五十事麗情集十二卷又朝說野語各三篇洎退居又撰脞說二十卷年七十六仍著詩賦雜文其子百藥嘗纂爲慶厯集三十卷見王得臣塵史

元棐關尹子言外經旨跋

關尹子言外經旨三卷宋陳顯微撰題曰抱一先生
門弟子希微子王夷受元刊本半葉十三行行二十
四五字不等前有劉向進書表寶祐二年顯微自序
王夷序後有葛洪後序葛序後有至元癸巳姬致柔
刊板木記 四庫未收阮文達始進呈案顯微字
字道自號抱一子寶祐間道士夷自號希微子顯微
弟子里貫皆未詳前有晉府圖書之印士禮居印席
鑑之印丕烈堯夫等印後有敬德堂圖書印虞山席
王焰攷藏印等印

道德真經指歸七卷本跋

道德真經指歸存卷七至卷十三題曰蜀郡嚴遵字君平撰谷神子注舊抄本先列經文每行十七字後接指歸低一格每行十六字注文雙行前有君平自序以胡震亨祕冊彙函本校之前脫君平自序千餘言卷一卽抄本之卷七卷二卽抄本之卷八卷三卽抄本之卷九卷四卽抄本之卷十卷五卽抄本之十一卷六卽抄本之十二至抄本之卷十三凡八千餘言秘冊本全缺每卷有杜撰篇名而不列經文字句奪落亦復不少敏求記箸錄之錢叔寶手抄本卽此

本所祖也谷神子注曰嚴君平者蜀郡人也姓莊氏故稱莊子書中所稱多設爲問難之辭莊子蓋君平自謂非引莊周書也津逮學津兩本與胡刊同蓋秘冊彙函之版明季歸毛子晉增爲津逮秘書津逮之版後歸張海鵬增爲學津討原故與胡刊無異皆非善本也

文子續義跋

文子續義十一卷元杜道堅撰舊抄本提要道堅字南谷當塗人武康計籌山昇元觀道士也其始末無考案道堅字處逸當塗采石人自號南谷子年十四決意爲方外遊乃辭母去着道士服宋度宗賜號輔教大師武康楊氏請住昇元報國觀元兵南渡道堅謁淮安忠教王爲民請命與語大悅入覲世祖詔馳驛江南搜訪遺逸道堅疏言養賢求賢用賢之道上嘉納使還提點道教住持杭州宗陽宮大德七年授杭州路道錄教門高士真人仍領昇元觀事又于計

籌山別立通元觀作攬古之樓聚書數萬卷箸老子
原旨及原旨發揮關尹闡元文子續義等書皇慶改
元授隆道沖真崇正真人依舊住持宗陽宮兼湖州
計籌山昇元報國觀白石通元觀延祐五年卒年八

十二

趙松雪人
杜真人碑